

Kualiti pendidikan di semua IPTS terus dikawal selia

LUM 27 AUG 2002

KUALA LUMPUR 26 Ogos – Kerajaan akan terus mengawal selia kualiti dan kemudahan pendidikan semua institusi pengajian tinggi swasta (IPTS) bagi menjamin tahap pendidikan yang ditawarkan mencapai standard yang ditetapkan.

Perdana Menteri, Datuk Seri Dr. Mahathir Mohamad berkata, kawalan menerusi Lembaga Akreditasi Negara (LAN) itu juga adalah bagi memastikan program pendidikan terutama program jarak jauh dan nama baik negara dalam bidang pendidikan tidak tercemar.

Menurutnya, langkah itu adalah sejajar dengan usaha kerajaan untuk menjadikan Malaysia sebagai pusat kecemerlangan pendidikan termasuk di kalangan pelajar luar negara.

“Bahaya yang wujud dalam penawaran pendidikan oleh mereka yang berniat serong ialah kualiti yang rendah dan sanggup menjual sijil, diploma dan ijazah tanpa mempedulikan sama ada kuliah dikendalikan atau tahap pengetahuan tertentu telah dicapai,” katanya ketika berucap merasmikan Universiti Terbuka Malaysia (Unitem) di sini hari ini.

Dr. Mahathir berkata, walaupun terdapat IPTS yang menganggap LAN sebagai satu campur tangan dalam operasi institusi mereka, namun kerajaan menganggap peranan LAN adalah diperlukan.

Persaingan

“Akhirnya nanti, institusi yang cemerlang dan diakui oleh LAN sebagai memenuhi standard yang ditetapkan, akan bebas daripada reputasi buruk yang dibawa oleh pengendali palsu dan dalam persaingan mendapatkan pelajar,” katanya.

Dalam pada itu, beliau berkata, pengusaha pusat pengajian tinggi perlu menggunakan daya kompetitif negara dalam industri pendidikan untuk mengembangkan lagi industri tersebut.

Katanya, walaupun Malaysia bukan tempat termurah untuk mendapat pendidikan tetapi negara ini jauh lebih murah daripada negara-negara yang pelajar Malaysia dihantar belajar.

Katanya, sebagai sebuah industri yang berasaskan perkhidmatan, pendidikan mampu menyumbang kepada pertumbuhan ekonomi terutama jika kerajaan dapat mengurangkan jumlah pelajar ke luar negara.

Dr. Mahathir berkata, dengan perkembangan teknologi komunikasi dan konsep pendidikan jarak jauh, Malaysia tentunya boleh menawarkan peluang baru yang akan membolehkan lebih ramai orang melanjutkan pelajaran.

Beliau berkata, dengan teknologi itu, pendidikan universiti yang s&u ketika dahulu hanya boleh diperoleh satu kelompok tertentu, kini boleh diperoleh oleh majoriti orang termasuk di negara membangun.